

San Nicolas a haci historia fin di siman

Ki fin di siman **San Nicolas** tabata tin cu **Soul Beach Festival**.

For di diasabra mainta 11 or, tur hende cu tabata kier a bende algo, sea cuminda, bebida, souvenir, tene show y otro actividadnan tabata tin nan lugarnan habri.

Pa prome biaha den historia **no a bin cu restriccionnan di kico por y kico no por, kende por y kende no por**.

No tabata tin palabra menciona di **criminalidad, terrorismo, gangnan, chollernan, peligernan esaki y peligernan esaya**, tras di cual ta sconde continuamente.

Na **Zeewijk** a converti un garashi den un **"Caribbean Hot Spot"** cu benta di cuminda y bar durante dia, acompaña pa musica di **Calypso, Soca, Zouk y Reggae**.

E fiesta á sigui te diadomingo madruga cu centenares di bishitante a goza **"un bol"** di e lugar ey y di e otro sitionan caribense cu a habri.

Patras di Warda di polis tabata tin e casitanan reconstrui estilo casnan di **Village** di decada 40 y 50 y paden banda musical a resona **soca, calypso, roadmarch** y otro ritmonan caribense.

Anochi e cura a wordo converti den un patio cu su mesitanan y cada stoel tabata ocupa for di 6 or atardi.

E **Dutch Caribbean Tent**, riba parkeerplaats di **Arubus** tabata formidable.

Varios agrupacion musical di hubentud a percura pa nan **Reagaton, rap, reggae y Cadans**. Aki tabata un fiesta completo cu tent cu bon surtido di roti, **stewed goat, stewed chicken ox-tail y tur cu currie, pelao, tambe saltfish cu Johnny cake**.

E bishitantenan a yena barica yen y a gaba e **"arte culinario"** caribense cu por a haya riba nos isla.

Entre tur esaki tabata tin nos mes cuminda di cas manera **carni stoba, galiña stoba, pisca hasa etc. y tur cu nan pan bati, aroz of funchi**.

Mi a goza con a cera caya grandi pa hendenan por a cana tranquil y cuanto turista a goza durante dia di haci compras den caya, y termina anochi dilanti **"Hotel Des-acaba"** na final di caya, unda tabata tin e stage di **"San Nicolas music life"**.

E turistanan no tabata tin palabra mas bunita di expresa di con nan a pasa diasabra na San Nicolas y tambe su continuacion diadomingo.

Hopi cu diasabra a bay **Joe Laveist** a prefera di pasa nan anochi diadomingo mey mey di **"Holland Town"** despues.

Esey ta motibo cu a mira menos bus na **Joe Laveist** Diadomingo anochi.

Hendenan local tabata den cielo moviendo mey mey di e turistanan y ta masha amistad a cera diasabra y diadomingo y hopi bishitante den futuro ta bin keda cerca famianan arubiano.

E promocion cu nos localnan a haci tabata tremendo cu balor mas grandi cu esun di e miyones cu ta gasta anualmente pa atrae bishitante.

No tabatin un negoshi cu no a probecha di e fin di siman. Nan a bende den dos anochi mas cu nan ta bende un luna largo sin actividad.

Tur comerciante di San Nicolas a gaba esaki masha hopi mes.

E publico a gaba cu no tabata tin **"medida, ley, reglamento (pa algun si y pa otro no) cu a bira tradicion arubiano"**. Tur hende tabata liber pa lanta nan propio negoshi chiquito pa e dos dianan sin e restriccionnan cu ta cabando cu tur iniciativa riba nos isla.

Ni ultimo fin di siman di carnaval por a compara cu e fin di siman cu ta tras di lomba.

Tur hende a pidi pa e ambiente aki tuma lugar tambe e ultimo siman di carnaval for di diabierna pa dialuna madruga 4 or.

Nunca den historia di San Nicolas hende a mira un ambiente festivo manera fin di siman cu a pasa.

SAN NICOLAS - "ZUMBI TOWN"

Loke a lesa aki riba tabata e fantasia riba fin di siman.

E berdad mes ta sigui aki bao.

San Nicolas cu fin di siman mester tabata e ciudad di fiesta, a keda mes **"Ghost Town"** di tur anochi.

E **Soul Beach Festival** a wordo promovi asina grandi caminda cu San Nicolas lo a yega cielo economicamente y turisticamente y riba e dos anochinan, **ni muhernan di bida no a "haya un bida"**.

Mi a pusta cu doño di un bar den cercania di **Joe Laveist** y mi a bise cu e no ta haya ni cinco turista como bishitante.

Mi a splike cu e conciertonan aki no ta pa San Nicolas.

Ta propaganda turistico na probecho di compania di transportacion, organizacion di hotelnan, oficina di turismo y pa negoshinan turistico.

Pa e pueblo lubida!

E homber a encarga decenas di caha di cervex y otro bebidanan pa despues di concierto haya e bishitantenan pa e **"afterparty"**.

Diadomingo 12.30 or merdia el a yamami. **"Bin busca bo caha di cervex y e dos boternan di bebida."**

Ora mi a punte cuanto turista el a haya el a contesta: **"Ni un!"**

Mi a splike cu dialuna en adelante, esnan cu a probecha lo sinta publica con bon e concierto tabata.

Esey sigur lo por ta na su lugar.

Pero ningun lo bisa con nan a dal San Nicolas un cara abao.

Ta esnan privilegia cu por a haya un stand den **Joe Laveist** lo por a fiesta cu bishitantenan, pero pafo di **Joe Laveist Sport Park** lubida.

Diasabra anochi **por a conta 18 bus** cu a yega cu bishitantenan.

Ni nos **"Tata di Cultura"** den su bida lo por a haya e servicio di wordo hiba cu bus te riba tereno, sin cu mester pasa control na porta manera tur arubiano (peligroso) etc.

E bishitantenan **a dreña den e Sport Park cu bus**, despues subi bus y bay directamente Playa unda e **"Afterparty"(nan)** tabata.

Nada pa San Nicolas.

E unico lugar na San Nicolas cu nan a conoce tabata parti paden di **Joe Laveist Sport park**.

Mi a dal un keiro den cayanar.

Den caya grandi, mi a topa cu 4 auto staciona riba acera; dos tres hende na pia separa di otro; un grupo di 3 hende sinta riba acerca na altura di **Charlie's Bar** y parti pariba.....?

Aki mi a mira dilanti e cantinanen, dos te tres **"mamasita" (bisti di gala, cu tapijt cora saliendo di cantina te riba caya) sperando cliente**.

Den cercania di **Sport Park** mes, bo no por a pasa.

For di crusada na **Paulus school** pa e crusada pariba di **YMCA**, caminda tabata cera.

Esey tabata pa busnan para dos dos banda di otro.

Pazuid di **Sport Park** tabata yena cu auto, pero mayoria di nan **V-wagen**, mescos cu autonan staciona panort di **Filomena College** bay abao. Casi tur tabata **V-wagen**.

Pazuid di **Sport Park**, ta algun famia por a mira.

Nan a bini cu nan jugnan y stoelnan pa ey fo sinta scucha musica.

Tur dos anochi tabata mescos.

Diadomingo mainta mi tabata na **Marriott** y aki mi a cuminsa tende e comentaronan di **"mi no ta bay awe nochi na e mes lugar"**.

Otronan no a gusta cierto artista pa diadomingo anochi y a dicidi di nos bay. Otro a kere cu e concierto lo ta canto di lama. (**Baby Beach** lo tabata ideal pa esaki).

Mi a spera un caida diadomingo anochi y kico mi a ripara?

Mi a conta 8 bus cu a yega **Joe Laveist**, menos hende pafo di **Sport park**, menos trafico y menos **V-wagen** staciona etc.

Eynan mi a calcula caba cu e cantidad di bishitante e di dos anochi a baha considerablemente, locual a bin resulta tambe despues.

Mi a dicidi di dal un keiro mas den San Nicolas y tabata contento cu **mi tabata e unico Spirito den Zumbi Town**, cu mester tabata tin ambiente festivo pa e cantidad di promocion cu a ser haci **CU San Nicolas**.

Di con mi tabata asina negativo for di cuminsamento? Pasobra di tempo cu a cuminsa den añanan 80 cu e **Aruba Jazz and Latin Festival**, esaki tabata festivalnan cu a resulta **"dudoso"** financieramente, principalmente si bay tras di tur e publicacionnan den curso di añanan di supuesto iregularidadnan financiero prome y despues di e anochinan, locual pa e **Soul Beach Festival** di e aña aki no por bisa cu ta asina.

Pero si cu semper tabata festivalnan cu pueblo no ta involvi. Tur cos ta draai rond di hotelnan, turistanan, negoshinan cu tin di haber cu turistanan, companianan di transporte cu ni un bida taxistanan no ta haya y negoshinan cu tin di haber cu turismo.

Na caminda di cas diasabra y diadomingo anochi, mi a mira algun taxi bashi, y mi a bisa den mi mes. **"Mira e spookienan"** yena den taxi.

Mi a puntra mi mes: **"ta cual PUEBLO di San Nicolas lo bay felicita mañan?"**

***Juby Naar.**